

# Boneiru i Bosnia: Mésun Malesa?

Ultimo añanan, kasi tur dia t'é mésun reportahe: mas tiroteo, mas hende heridá, mas morto. Si bo ta puntra nan pakiku nan ta bringa, talbes nan no por kontestá. Nan sa solamente ku den pasado, e otro gruponan étniko a maltratá na antepasadonan. Nan mayornan a indoktriná nan ku nan propio grupo t'esun mihó, e otronan ta malbat. Pues, e violencia di awendia ta resultado di amargura ku a kushi pa síglonan.

Pa nos, e konflikto na Bosnia ta un enigma. Ma si e análisis aki di un èk-habitante di Yugoslavia ta korekto, rais di e konflikto di Bosnia ta krese salú na nos islanan. No ta serbionan, kroatnan, i muslimnan so ku ta nenga pordoná. E malesa aki tambe ta bon konosí riba nos pid'i baranka.

Señoranan bisiña no ta papia ku otro pa motibu di algu ku a sosodé añanan anterior. Talbes el a kuminsá ku un kos chikitu: un a lubidá di kumindá otro, yu a kibra bentana di bisiña, un palabra ku a ofendé, èts. Ma el a eskalá i awor e yunan, prohibí di papia ku e muchanan bisiña, ta lamta ku un rabia pa ku bisiñanan, kisas sin sa dikon...méskos ku Bosnia.

Ma no ta bisiña so. Koleganan ta nenga traha ku otro. Dos mucha muhé tineger ta bira enemigu mortal pa motibu di un mucha hòmber ku tur dos ta gusta. Esposo no ta dispuesto pa lubidá kon su esposa a ofendé. Mayornan siegamente ta tuma parti pa nan yu kontra e dosente (irespekto di e maldat di e yu). Suidadanonan ta tene e agente di polis na kurason komo resultado di sièrtu akshon òf medída. Ningun ke pordoná.

Komo resultado, algun ta hasi kos ridíkulo. Nan ta krusa kaya, sinta pafó den solo, kambia di trabou, buska otro ruta, muda, kibra plan di vakansi, keda sin gosa un evento deportivo, èts. simplemente pa evitá di topa e pèrsona ku na ta nenga pordoná. Otronan ta tuma medida mas severo: redu, kritiká, bòikotiá, táktikanan bou di man, violencia, èts...manera Bosnia.

Kiku bo ta logra dor di nenga pordoná? Inkonsientemente bo ta bira katibu di esun ku a ofendé. Bo bida ta lora rònt su skema. Konstantemente bo ta pensa tokante e kontrikante. Amargura ta yena bo kurason i ta kompaña bo konstante.

Bo sa ku Palabra di Dios ta eksigí pa hende pordoná, i bo ke pa esaki sosodé...aloménos ora ABO t'esun ku tin mester di pordon. Ma ora ta BO turno pa pordoná, tur klase di ekskusa ta skeiru. "E ni sikiera a pidi despensa." "Mi' ta sinti pa pordoná. E herida ta muchu fresku ainda!" I e ekskusa mas konosí (i mentiroso): "M'a pordoná, pero mi'n ta lubidá." Dios ta bisa, "Pordoná!" Ningun ekskusa ta válido serka dj'E.

Nos tur konosé e orashon "Nos Tata" fo'i kabes desde tempu ku nos ta mucha. Hopi hende ta res'é tur dia, asta vários bes pa dia. Ma maske nos sa e orashon bon, ta klaro ku nos no ta paga suficiente tinu na e palabranan.

Nos ta pidi Dios pa, "..pordoná nos...méskos ku nos tambe ta pordoná..." (Mateo 6:12). Si nos ta honesto, ningun di nos ta deseá esei. Ningun di nos ke pa Dios pordoná nos MESKOS ku nos ta pordoná otronan. Nos ke pa E pordoná nos MAS ku nos ta pordoná otronan, pasobra nos sa ku nos pordon ta laga hopi di deseá. Ma Dios Su pordon pa ku nos ta segun e midí di nos pordon na otronan.

Hesus, sabiendo ku nos tin un problema ku e konsepto aki, a bolbe enfatisá e importansia di pordoná inmediatamente despues di e orashon "Nos Tata." El a bisa, "Si boso pordoná hende nan ofensanan, asina boso Tata selestial lo pordoná boso tambe; ma si boso no pordoná hende nan ofensanan, boso Tata LO NO PORDONA BOSO TAMPOKO boso ofensanan" (Mateo 6:1-15).

Tur di nos, sin eksepsion, tempran òf lat lo ser ofendé, ignorá, insultá, maltratá, malkomprendé, èts. Bo no por evitá esei; e ta un parti di bida. Sin duda algun ofensa ta mas serio ku otro. Ma loke ta importante ta KON BO TA REAKSHONA PA KU E OFENSA. Bo por hasi méskos ku Kristu, ku soportando e ofensa mas grandi di historia riba krus a bisa, "Tata, pordoná nan." Bo por SKOHE pa pordoná, i gosa e alivio ku esei ta ofresé. Of bo por SKOHE pa nenga pordoná, reproduciendo e "fièrnu" di Bosnia den bo mes kurason i kas. Ta bo desishon.